

四庫全書

史部

欽定四庫全書

平定準噶爾方略正編卷八十二

乾隆二十四年十一月庚戌

諭參贊大臣舒赫德等查勘回地出產硝磺

上諭軍機大臣曰據德文奏稱內地所送鉛子火繩  
尚足敷用惟火藥無多查庫車附近出產硝磺可  
以採取配合給與臺站卡倫官兵其舊存火藥加  
意照看收貯備用等語庫車附近既產硝磺較之

內地運送更屬近便看來阿克蘇等處或有出產亦未可定可傳諭舒赫德楊應琚留心查勘採取以備軍需

壬子

定邊將軍兆惠等疏奏留駐兵丁事宜

兆惠等奏言副將軍臣富德於十月初二日自拔達克山凱旋俟抵葉爾羌後臣等酌將葉爾羌喀什噶爾兩城應留駐滿洲索倫蒙古兵若

若干餘即行撤回議奏辦理其綠旗兵八千餘  
名回地糧餉價昂且屯田亦須調遣除伊犁駐  
兵另議外酌於葉爾羌喀什噶爾各駐兵一千  
名英噶薩爾駐兵五百名俱于本年派出新兵  
內揀選以提督董孟總兵容保楊寧分領餘兵  
令提督閻相師總兵五福等帶往庫車其舊調  
之兵即撤回原處又西安兵四百名酌留字識  
外餘亦撤回奏入

上諭軍機大臣曰兆惠所奏撤兵一事朕意上年調  
往之滿洲索倫兵俱在外未久且暫留該處惟得  
傷病廢人等自應撤回將來伊犁駐防需兵尚多  
應另派京營滿兵更替行走俾伊犁等練習事務甚  
有裨益著傳諭知之

乙卯

諭陝甘總督楊應琚等派兵屯田事宜

上諭軍機大臣曰楊應琚奏稱即日班師凱旋其應

行派往烏魯木齊之官兵五千名正可順道分撥  
必得提鎮大員統轄等語現在閏相師五福等揀  
選所餘兵丁回至庫車即于此內酌撥著閏相師  
領赴烏魯木齊辦理屯田事宜可傳諭楊應琚舒  
赫德會同妥辦併諭兆惠知之

丙辰

命御前侍衛署副都統安泰總理屯田貿易事務  
上諭軍機大臣曰昨因大功告成無庸再送馬匹命

安泰回京今思來年烏魯木齊等處增兵屯田又有哈薩克貿易恐永德永瑞二人辦事不能周到安泰係內廷人員尚可任使著不必來京即前往烏魯木齊總理屯田貿易事務

戊午

定邊將軍兆惠等疏奏霍罕額爾德尼等遣使入

觀

兆惠等奏言二等侍衛達克塔納等於十月初十日回營告稱先由克什噶爾起程至額德格訥布魯特阿濟比所居之諾哈特將伊等收服後隨至安集延其為首四伯克供給羊隻住居六日又收服瑪爾噶朗人衆又住居十二日霍罕額爾德尼伯克會集那木干等城伯克及奇卜察克等布魯特並霍罕摩羅呵琿等相見傳示將軍檄文額爾德尼告稱聞大兵平定準噶



爾收服布魯特我等甚為瞻望今情願將所屬  
安集延瑪爾噶朗那木干霍罕等四城為

大皇帝臣僕敬遣頭目擇吉起程等語旋供給酒食  
衣服馬匹遣屬人托克托瑪哈瑪特拜嗎哈瑪  
特同來察看各城生計富饒人情恭順起程後  
沿途招服齊里克頭目優瑪特之兄呼達呼里  
及將軍交查額爾克和卓之弟帕爾薩和卓現  
在嗎爾噶朗城內亦皆同來等語臣等即令來

使入見伊等跪獻恭進

皇上表章暨臣等書呈譯其書云額爾德尼伯克敬

請

大皇帝欽差統兵將軍大人等安仰賴

大皇帝洪福大衆安善聞得吟薩克布魯特俱奉檄

文我等正在盼望今侍衛等前來不勝感悅特

差親信人等面稟如蒙許允進京並求指示等

語臣等詢問來使有何面稟據稱我布魯特諸

部每相侵奪我額爾德尼伯克欲為剖斷是非  
懇求

大皇帝賞給璽書約束布魯特等語臣等告以各布  
魯特等多有先來歸附者今爾等惟應將四城  
屬人自行加意管轄不生事端

大皇帝自必加

恩前經額爾格訥之阿濟比告知額爾德尼歸附之

信已蒙

勅諭並賞給緞匹荷包因路遠尚未賞到今將爾等  
護送入京瞻仰

天顏敬聆

聖訓遵行又詢據呼達呼里等告稱我等共四千餘  
戶頭目優瑪特因未出痘令我等入京等語請  
俟額爾德尼恭

進馬匹及阿濟比來使到日即交達克塔納等帶  
領入

觀計來年正月上旬可至京師謹將額爾德尼等奏

章繙繹恭呈

御覽其原奏仍交來使齎捧奏入得

旨下部知之

命陞賞收服霍罕等城之侍衛達克塔納等

上諭軍機大臣曰兆惠等遣往收服霍罕等部落之

侍衛達克塔納及隨行之領催三濟等甚屬奮勉

二等侍衛達克塔納著加恩授為頭等侍衛巴爾

虎領催署驍騎校三濟著授為驍騎校馬甲納卜  
齊著授為領催厄魯特薩爾泰著獎賞藍翎

命加賞副都統愛隆阿世職官兵從優議敘

上諭軍機大臣曰富德等奏稱愛隆阿領兵百餘名  
巡查臺站捉生詢問知瑪呼斯賓巴等男婦一百  
三十餘人謀搶察罕烏蘇等臺站逃往安集延愛  
隆阿即領兵追襲勦賊五十餘人俘獲男婦七十  
餘人收取馬駝軍器等語愛隆阿一聞賊人信息

即行追勅甚屬可嘉從前曾賞伊世職著再行加賞仍從優議敘其得功官兵著造冊送部亦從優議敘

諭定邊將軍兆惠等查奏陣亡之索倫尼薩勒圖等上諭軍機大臣曰今日引見索倫佐領據巴里奏稱伊父尼薩勒圖於乾隆二十一年賞送諭旨與達爾黨阿由雅爾拉河前往未回業經陣亡啟圖奏稱伊兄克勒車爾二十一年在總管畢里袞隊

內於阿魯海地方陣亡旋因策楞獲罪未知曾否  
報部等語隨交該部查閱陣亡冊內並無二人之  
名著傳諭兆惠等查明具奏

定邊右副將軍富德奏敘西安滿營筆帖式綏  
保隨侍衛達爾黨阿辦送馬匹行走勤慎

命以應陞之缺即用

定邊右副將軍富德等疏奏敘卹陣亡受傷官  
兵及辦理沙喇斯瑪呼斯等賊衆



富德等奏言臣等前駐拔達克山邊界派出官兵搜剿盜竊臺站之布魯特等查有察哈爾署參領敦多克兵丁羅卜藏護軍噶爾丕等尋踪遇賊中鎗陣亡臺站兵丁阿玉什旺扎爾巴雅爾圖察哈爾兵丁烏巴什俱以遞送事件遇賊被害健銳營前鋒雙泰因布魯特賊衆盜馬捕賊陣亡並受傷兵丁五名均請交部議敘議卹又欽奉

諭旨沙喇斯嗎呼斯餘衆內有無戕害滿福之數多  
克哈什哈查臣等在瑪爾濟鼐勦滅賊衆時即  
詢及二賊厄魯特等僉稱二賊自誘害官兵後  
愈肆狂悖為衆所殺並未逃入回部奏入報  
聞

己未

以副都統愛隆阿勦賊功績

宣諭軍營

上諭軍機大臣曰愛隆阿巡查臺站一聞瑪呼斯餘孽欲行搶掠即領兵追襲盡勦賊衆已諭部從優議敘加賞世職矣愛隆阿此次奮勉更非尋常勦賊可比蓋大功既成此等逸賊並未責伊專辦即使逃脫伊亦不至獲咎乃聞信即行俾逆黨不致漏網而臺站得以無虞可謂急公任事大臣官員等果能如此存心何功不就朕深為嘉予從前賞伊雲騎尉世職著加恩賞給騎都尉此時兆惠等

應已起程著舒赫德傳諭愛隆阿并通諭大臣官員兵丁等知之

諭定邊左副將軍成袞扎布寬免嚮道達什扎卜等  
鞭責治罪

上諭軍機大臣曰成袞扎布奏稱嚮導達什扎卜博博貴等往策布登扎布軍營遞送事件歸途擒獲嗎哈沁知有盜馬賊人踪跡選騎兵十二人往捕賊黨頗衆我兵被陷者七人旋經脫出達什扎卜

等復請前往追捕効力自贖核其情罪酌將伊等  
插箭遊營仍鞭一百等語達什扎卜等係遞送事  
件之人聞嗎哈沁等踪跡即行追捕尚屬奮勉即  
以兵少致敗亦屬情有可原著不必治罪

命直隸等省督撫選拔沿途臺站各弁加恩酌量錄  
用

上諭大學士曰西陲大功告成臺站各員已令該督  
撫等查明咨部議敘至此次遞送紅旗之千總外

委各員自軍興以來均屬按刻飛馳勤慎無悞應  
量為優擢以示鼓勵著直隸山西陝甘各督撫等  
按照本省道里遠近於沿途各員中分別選擇內  
有行走奮勉人材可觀者以五人中拔取一人為  
率出具考語送部引見候朕酌量錄用

辛酉

命晉陝甘總督楊應琚官階

上諭大學士曰陝甘總督楊應琚籌辦軍需循照大

學士伯黃廷桂規畫章程俱能實力經理所辦凱旋馬匹措置尤為妥協現在西陲善後事宜正資襄贊著加恩晉階太子太師以示優獎

癸亥

諭參贊大臣舒赫德加意牧放馬匹

上諭軍機大臣曰書山奏稱烏魯木齊解送哈薩克馬一千餘匹於九月二十六日至哈喇沁爾休息二日即行起程等語著傳諭舒赫德此項馬匹解

送阿克蘇等處以備搜剿嗎哈沁及屯田之用宜  
加意牧放以備調撥其送馬官兵若辦理妥協亦  
應加恩原任藍翎侍衛達爾扎桑若行走尚好即  
酌量奏請開復

命甘肅運糧價值仍遵前

旨一體加恩增給

上諭大學士曰甘省輓運軍糧及調運協濟糧石所  
需腳價前據大學士黃廷桂奏明疊經降旨一體



增給俟秋成後仍照舊例支給但該省本年收成  
歉薄糧價尚未平減其一切運費著再加恩仍暫  
照從前增給之數一體支給俾輓運貧民日用充  
裕以示體恤該部遵諭速行

定邊左副將軍成衮扎布疏奏北路撤兵事宜  
成衮扎布奏言查策布登扎布所領游牧兵三  
百名卡倫兵二百名布延圖兵三百名扎哈沁  
兵二百名已遵

旨行文令其各回原處至臣等現議布延圖不必駐  
兵而烏里雅蘇台兵丁尚少應即令調往駐劄  
奏入報

聞

侍郎銜書山疏奏安插多倫回衆

書山奏言查多倫回衆五千餘人自阿克蘇分  
隊向庫爾勒前來自庫車以東哈喇沙爾以西  
起玉古爾臺至碩爾舒克臺有四五處皆可引

水溉田分布安插臣同吐魯番公素賚滿阿卜  
都賚之姪色底克至庫爾勒等處相度辦理又  
羅卜淖爾有伯克托克托所屬三百餘戶懇請  
屯田應請交與伊弟阿卜都賚令其管轄奏入  
報

聞

甲子

諭定邊將軍兆惠等查辦喀什噶爾等處潛匿之烏

## 沙克回衆

上諭軍機大臣曰納世通奏稱烏什卡倫兵張茂等擒獲逃回二人係已經招降之烏沙克旋復逃往喀什噶爾藏匿二十餘日聞內移之信遂逃向烏什阿克蘇業經正法示衆等語看來喀什噶爾葉爾羌尚有烏沙克等餘衆著傳諭兆惠舒赫德等查明各處似此潛匿之人若安靜無事則已稍有滋事即應酌量辦理具奏

諭叅贊大臣阿桂防範沿途內移回衆

上諭軍機大臣曰德文奏稱章京格勒爾圖由阿克蘇送來多倫回衆五千餘名除沿途病斃及親戚留住外仍有四千四十餘人等語此等回人齎糧無幾恐沿途流為嗎哈沁宜留心防範毋致盜竊臺站馬匹牲隻如有滋事者即行正法以靖地方諭禮部侍郎五吉等增備臺站馬匹

上諭軍機大臣曰現在拔達克山霍罕等處遣使入

觀一路臺站馬匹自應整理妥協以壯觀瞻而速  
郵傳在內地臺站自必預備應付其哈密以外著  
五吉於巴里坤牧馬一萬匹之內挑選一千匹由  
哈密至闢展分派其闢展庫車阿克蘇葉爾羌著  
定長書山納世通阿桂遞行交辦務使一律整齊  
俱即傳諭知之

諭陝甘總督楊應琚等酌議屯田事宜

上諭軍機大臣曰定長等將本年闢展托克三烏魯

木齊哈喇沙爾喀喇和卓等處屯田收穫分數具奏又稱除烏魯木齊外其他地畝較之初種時漸覺歉薄等語此等田畝雖不能如內地人工糞治可以常年耕種但地頗寬敞彼此遞年互調耕作自有餘力著傳諭楊應琚會同舒赫德定長卷心講求酌議具奏

按察使銜納世通疏奏裁汰兵丁

納世通奏言查庫車回城地狹事少現駐官兵

百餘名足敷調遣其阿克蘇差務頗繁所駐綠旗兵一千二百六十餘名看守城堡倉庫牧放馬駝牲隻添派臺站卡倫城內餘兵僅六十餘名不便再為裁減除軍營將來撤回綠旗兵即遵

旨揀選調往屯田臣所領追勒嗎哈沁之西安兵一百二十名及阿克蘇所留西安兵二百五名內共裁汰一百五十名撤回巴里坤仍辦給車輛



遣歸原處奏入報

聞

管理屯田副都統定長疏奏修建倉堡事宜

定長奏言闢展等五處屯田收穫後積貯穀石  
必須建倉築堡查闢展已有舊設倉堡仍需添  
建修葺其喀喇和卓新建倉二十四間堡一座  
托克三倉二十間堡一座哈喇沙爾倉十五間  
堡一座烏魯木齊倉二十四間堡一座闢展添

倉三十間及修葺舊堡照巴里坤修城例賞給銀兩共六百五十七兩五錢有奇奏入報

聞

丙寅

命凱旋將軍大臣官兵及援達克山等部入

覲陪臣均由內地南路進京

上諭軍機大臣曰援達克山安集延等部落陪臣入覲已諭沿途各督撫等加意料理今據鄂弼奏稱

沿邊一帶間有偏災恐未能整飭可傳諭鄂弼一切供應官兵及回部使人俱由內地南路豫備並傳諭直隸陝甘各督撫等一體遵照再著陝甘各撫先期知會將軍大臣等均由內地來京昨據吳達善奏分飭南北兩路探聽凱旋官兵接濟馬匹今既由南路行走自應酌量調撥其北路豫備馬匹祇須足敷臺站之用其餘可酌量調赴南路俾官兵等通行無悞併著傳諭知之

命封公扎拉豐阿為貝子散秩大臣薩喇爾為伯

戊辰

命增給甘肅各營來年糧料草束折色價值

上諭大學士曰甘省今歲收成稍歉糧草價值較昂  
滿漢各營所支折色若照舊例則購買未免不敷  
所有來年官兵改折糧料草束及採買滿營糧草  
價值著加恩照二十三年之例一體加增其河州  
鎮標臨洮鞏昌二營及陝省之延安榆林固原一

帶各標營隸于甘省者均屬災歉之區著一例增給以示體恤該部遵諭速行

諭護軍統領努三等追勦嗎哈沁事宜

上諭軍機大臣曰努三等奏稱阿拉善佐領布岱招降嗎哈沁雲敦等十五人酌留堪為嚮導者三人餘俱解送京師現在修理穆素爾嶺道路俟追勦逸賊事竣後將索倫吉林兵丁撤回等語布岱既招降嗎哈沁等著酌量獎賞此等降人尚未盜竊

生事著發往甘肅分賞官兵努三等修理道路即  
擬追勦逸賊甚屬可嘉若能弋獲匪犯則伊與永  
貴等從前疎忽之咎俱可寬免但伊等此時應已  
奉到來京之旨即暫回亦可將來所撤索倫吉林  
官兵著從巴里坤辦給車輛由肅州行走各回原  
處

陝甘總督楊應琚疏奏辦送馬駝事宜

楊應琚奏言臣前因大兵凱旋擬將巴里坤馬

匹解往以備乘騎今准兆惠咨文停止將第一  
起馬五千匹仍交總兵存秦牧放其第二起甘  
省滿漢營馬二千餘匹將抵哈密擬撥一千五  
百匹赴巴里坤牧放以備伊犁等處駐兵屯田  
之用其餘留於哈密以備差務至陝省所調馬  
匹將抵河西請以撥補摘缺則嘉峪關以外所  
儲芻豆俱移為凱旋官兵馬匹之用又舒赫德  
等請自闡展至庫車分派駝隻以供轉運查臣

前辦駝一千一百隻近准定長咨撥昌吉羅克  
倫烏魯木齊等屯以供轉運應將軍營行裝駝  
隻及節次收獲賊駝分派各臺站休息牧養及  
解馬官兵未用之駝三百餘隻亦可添補額數  
奏入報

聞

己巳

諭定邊將軍兆惠等酌量伊犁駐兵屯田事宜



上諭軍機大臣曰據德文奏稱准舒赫德咨查沙雅爾河道通葉爾羌喀什噶爾可否造船試運及堆貯糧石之處查沙雅爾距庫車百四十餘里中間有衛林河之奇塔特地方可貯留糧石等語從前舒赫德以此具奏已降諭旨謂伊犁駐兵屯田於來年次第辦理不必多派官兵回衆一時安插并傳諭兆惠富德楊應琚等會商妥議即如糧運一事自葉爾羌等處由阿克蘇穆素爾嶺前至伊犁

乃正路也若謂山嶺難行由庫車運往則其路更遠豈此間別有捷徑乎計兆惠等此時已與楊應琚會議若業經派出回人數百戶行裝亦辦來年四月尚能耕作即遣往亦可或不能速辦可酌量派兵一千俟來年草生時由穆素爾嶺前往伊犁巡查仍向阿克蘇駐劄俟辦理屯田就緒於後年發往兆惠富德若已起程舒赫德即與楊應琚會議具奏

諭駐劄開展副都統定長刻石紀功各事宜

上諭軍機大臣曰定長奏稱前奉諭旨來春於伊犁之格登山刻石紀功順便搜捕嗎哈沁請將阿定保所領之兵選派百名並懇請効力之舒景阿前往等語昨據努三等請派阿定保兵丁過嶺追賊已諭將此等在軍營年久之索倫吉林兵仍遵前旨撤回又諭兆惠等酌派官兵一千來春往伊犁巡查則刻石之事自可兼辦今定長處既有工匠

著即發往葉爾羌先行刻石紀功俟工竣後再同  
發往官兵前往伊犁於格登刻石現在葉爾羌督  
工即著舒景阿去

命侍郎海明馳驛前往葉爾羌協同舒赫德辦事

命闕展糧務同知伊星阿以知府補用遊擊覺羅達

興阿以叅將補用

壬申

命獎賞喀爾喀營旗章京策木伯勒等

上諭軍機大臣曰成衮扎布奏稱管旗章京策木伯勒署驍騎校阿喇克遞送策布登扎布軍營事件始終妥協等語策木伯勒著加恩賞戴孔雀翎仍賞緞四端阿喇克著賞緞二端以示鼓勵

癸酉

定邊將軍兆惠等疏奏回城駐兵各事宜

兆惠等奏言回部平定各城永息干戈而安撫新降仍須駐兵彈壓請于葉爾羌駐兵一千令

副都統豐安領健銳營兵三百名侍衛達爾黨  
阿總管巴雅爾領索倫兵五百名散秩大臣鄂  
齊爾領厄魯特兵二百名以散秩大臣永慶巡  
查臺站卡倫於喀什噶爾駐兵一千派索倫兵  
五百久察哈爾兵三百名厄魯特兵二百名令  
副都統伊柱管領于英噶薩爾駐兵五百派索  
倫兵三百名察哈爾兵二百名令副都統豐訥  
亨管領其阿克蘇烏什等處官兵以阿桂統領

仍派副都統傅景總管羅爾本泰敏珠爾厄魯  
特副管旗章京密什賚等分管其軍營年久官  
兵俱行撤回計乾隆二十年二十一年派出之  
健銳營兵二十餘名吉林兵七百餘名以愛隆  
阿管領索倫兵二千餘名以瑚爾起由屯鄂博  
什溫布分領察哈爾兵七百餘名以端濟布敏  
珠爾多爾濟管領喀爾喀兵百餘名以公朗袞  
扎卜管領阿拉善兵百餘名以公袞楚克管領

辦給資裝撤回原處派侍衛訥齊訥特通額塔爾海棟保烏爾圖納遜查拉豐阿塔瑪璽瑚什科普薩額爾登額蒙固勒烏三泰等沿途照管行走至綠旗官兵臣等業經奏派駐劄葉爾羌等城餘兵撤回本營近准總督楊應琚議奏屯田兵丁需用萬人請于撤回官兵內就近截留除在軍營年久及隨臣兆惠富德等著有勞績者均撤回休息將續派新兵酌留阿克蘇一千



名和闐三百名烏什三百名賽里木二百名拜  
二百名其餘發往烏魯木齊等處屯田所有阿  
克蘇等處駐兵事宜臣阿桂與閔相師五福辦  
理奏入

上諭軍機大臣曰兆惠等奏葉爾羌等處駐劄官兵  
名數其餘悉行撤回等語所留厄魯特兵二百名  
尚未妥協伊等皆新附之人在軍營頗著勞績若  
令久駐既慮其未諳紀律且亦當稍為休息著傳

諭舒赫德等此二百厄魯特兵即著鄂齊爾帶領  
撤回仍曉示以安插內地承受恩澤至厄魯特烏  
魯木齊六人內袞楚克扎卜陣亡殊可憫惻著查  
伊妻子加恩優卹烏魯木等亦甚屬奮勉著舒赫  
德傳諭詢問如願來京即行資給起程或願在軍  
營効力亦酌量獎賞厄魯特碩通懇請留營効力  
甚屬可嘉著加恩酌賞銀兩訥齊訥等係乾清門  
侍衛即著來京供職傳景仍遵前旨來京

命以索倫佐領三達保為副總管

上諭軍機大臣曰兆惠等奏稱索倫佐領三達保因在鄂壘扎勒圖勦賊有功陞授二等侍衛此次効力出衆官兵俱加恩陞用三達保或授為頭等侍衛或照伊等營制授為副總管請旨遵行等語三達保係索倫佐領著加恩授為副總管

命復革職効力佐領鄂木布原官

上諭軍機大臣曰察哈爾佐領鄂木布前以不善牧

馬革職今據兆惠等奏稱伊在固木等處收輯流  
散安插回衆數百戶又訪知回人窖麥接濟臺站  
口糧辦事亦無遲悞等語鄂木布自悔前愆奮勉  
効力著加恩仍授為佐領

定邊將軍兆惠等疏奏回城伯克入

覲各事宜

兆惠等奏言回部平定應令各城伯克等輪班  
入

覲請於凱旋之便帶領貝勒霍集斯公噶岱默特署  
阿奇木伯克之霍什克伯克等前來其餘分為  
三班以來年為始次第入

覲將來貝子鄂對公阿什默特押送內移回人事竣  
即就便來京又安集延相近之哈爾塔金布魯  
特頭目納底爾瑪特遣其弟伯克頗拉特告稱  
云我兄管領有一千五百戶呼圖和卓管領有  
五百戶情願歸誠入

觀等語臣等即令與奇卜察克之比阿奇木同來奏

入報

聞

甲戌

諭定邊將軍兆惠等安插霍集斯事宜

上諭軍機大臣曰兆惠等奏稱大兵凱旋霍集斯告

請同行入覲看其情形尚無他故前因霍集斯知

額敏和卓已受王封而已尚為貝勒故仍稱為伯

克且尙舒赫德飾詞謂烏什原無貢賦恐難信任  
是以密諭兆惠帶領來京今伊既懇請同行且去  
年葉爾羌被圍殊為勞苦此次往拔達克山亦頗  
効力自應加恩但仍令其居于舊地究屬未便俟  
伊到京時再酌量從優安插伊子漢咱吧爾起程  
亦不必照解送厄魯特宰桑之例仍與前次入覲  
一體辦理伊性好猜疑恐其驚惶滋事舒赫德等  
當善為慰遣昨命傳景來京即令其沿途護送務

期妥協霍集斯其餘諸子作何辦理亦著具奏

諭陝甘總督楊應琚等酌議新疆官制

上諭軍機大臣曰西陲大功告成一應事宜必期熟  
籌可久從前哈密巴里坤闡展等處辦理糧餉臺  
站諸務俱由內地派員經理今軍需事竣而新隸  
版圖均有專則若仍行兼辦致本任久懸殊非常  
制且甘省各營伍官職較他省獨多原為他屬邊  
疆起見今準噶爾回部蕩平屯田駐兵自伊犁以



達葉爾羌向日之邊陲又成內地則文武員弁均應依次移補方與輿地官制俱為合宜其哈密巴里坤以西應須用道府同知若干員一半于內地事簡處裁汰移駐一半酌量添設駐兵屯田各營應設將弁等亦一體籌辦庶于國計邊防兩得經久之道著傳諭楊應琚或途遇兆惠等詳悉會商或與舒赫德等悉心酌議具奏

命分貯軍前礮位於哈密巴里坤

上諭軍機大臣曰兆惠奏稱內地所送大神威礮十  
一位回部無需多設請于葉爾羌喀什噶爾各留  
二位餘七位來春送回原處等語所奏甚是但運  
送頗覺路遠哈密巴里坤亦可存留著楊應琚酌  
於此二處分貯

命副都統伊勒圖前往阿克蘇管領兵丁

上諭軍機大臣曰昨諭傅景來京著伊勒圖前往阿  
克蘇管領兵丁冰瑞仍駐劄烏魯木齊辦理屯田

事務

丙子

命提督閩相師來京

陞見

上諭軍機大臣曰提督閩相師現領屯田兵丁赴烏魯木齊辦事念其隨將軍兆惠等進兵著有勞績今大兵凱旋著傳諭楊應琚於內地總兵內派員更替即令其來京陞見

[illegible]

欽定四庫全書

平定準噶爾方略正編  
卷八十二

三十

平定準噶爾方略正編卷八十二

欽定四庫全書

平定準噶爾方略正編卷八十三

乾隆二十四年十二月丁丑朔

命陞敘闢展辦事効力人員

上諭軍機大臣曰定長奏西安馬甲富泰涼州領催  
巨佛保西安前鋒德克精額石麟領催卓特巴莊  
浪馬甲佟其良等辦理臺站屯田事務俱屬奮勉  
効力謹分別保題等語著加恩授富泰巨佛保為

驍騎校遇缺卽補德克精額石麟卓特巴佟其良  
著交各該將軍等遇有驍騎校缺出以次題補

戊寅

命解送逆賊霍集占等親屬及隨從人口來京

上諭軍機大臣曰定長奏稱兆惠等解送波羅泥都  
霍集占等親屬十八名口已至闡展辦給口糧送  
京其隨從男婦等除病故外餘俱解至吐魯番暫  
行收管請旨安插等語此等回人男婦著一同解

送來京俟到日著軍機大臣具奏請旨

已卯

授定邊右副將軍富德為領侍衛內大臣

諭定邊左副將軍成袞扎布等確查烏梁海被掠情

形

上諭軍機大臣曰成袞扎布等奏據察達克呈稱扎  
卜堪哈克圖兩旗五佐領人等在珠特和碩布固  
烏蘇等處過冬於十一月十二日有哈薩克二百



餘人前來搶掠章京默勒特勒克驍騎校圖瑪達克等十人被害察達克隨帶兵往探請即行策應防範暫停入覲等語哈薩克性同禽獸伺間搶掠亦事之所有察達克若能追勦固善但此等薩達克不知係何部落若阿布賚所屬似不應有此或係俄羅斯烏梁海之間所居哈薩克被俄羅斯煽誘亦未可知總之本非大事惟交察達克等加意探聽防範堵截擒勦即須辦理亦待來年成衮扎

布仍著來京莫尼扎卜請悉烏梁海情形著前往  
查勘一得確信作速具奏俱著傳諭知之

命陞賞拏獲逃犯之商伯克邁喇木

上諭軍機大臣曰兆惠等奏稱解京之喀什噶爾阿  
奇木伯克墨墨氏敏之子阿卜都里木於中途逃  
匿為商伯克邁喇木拏獲業將逃犯正法示衆賞  
給邁喇木緞匹以示鼓勵等語邁喇木以新附之  
人奮勉獲犯殊屬可嘉著加恩賞銀五十兩以應

陞之缺補用仍著舒赫德傳旨獎諭嗣後有似此  
奮勉者即照例辦理

諭定邊將軍兆惠等酌量安插陷賊兵民

上諭軍機大臣曰兆惠等奏稱查出先年被賊搶掠  
之綠旗兵及民人旗奴又上年被掠之巴爾虎喀  
爾喀綠旗兵逐一詢問遣回各該處其失於查報  
之將軍大臣官員等應交部議處等語伊等陷身  
回地若係臨陣得傷倉卒被掠者來投雖晚情尚

可原即不妨編入原伍至若中途患病潛匿山林就近逃入回部則其心殊不可問著從寬免其正法照民人例解回原籍所有漏報之將軍大臣官員等分別議處自所應得但大功已竣亦著加恩寬免

命瓜勒察兵丁與席伯旗分一體陞用

上諭軍機大臣曰據吉林白都訥之瓜勒察驍騎校獎賞孔雀翎烏靈阿等呈報康熙年間伊等與席

伯旗分均因獲罪停其授職續因將軍等奏准瓜  
勒察授職不得過驍騎校遂為定例而席伯等移  
駐盛京仍邀錄用等語瓜勒察席伯等前雖俱停  
陞轉而席伯移駐後仍照常錄用今瓜勒察等行  
走頗屬効力著加恩一體陞轉錄用

命陞藍翎侍衛啟泰為三等侍衛

上諭軍機大臣曰兆惠等奏稱藍翎侍衛啟泰招降  
奇卜察克布魯特在阿勒楚爾伊西洱庫爾淖爾

擊賊直至拔達克山俱奮勉効力等語啟泰著加恩授為三等侍衛

命獎賞孔洽沁公扎木禪等令其即回游牧

上諭軍機大臣曰扎木禪奉到遣回游牧之旨奏請仍與齊努渾等同往齋爾錫里地方隨策布登扎布堵賊効力等語誠悃可嘉著再加恩賞緞四端今大功告成仍與多岳特各回游牧齊努渾亦著來京

辛巳

諭叅贊大臣舒赫德等令官兵學習牧養

上諭軍機大臣曰舒赫德等奏稱葉爾羌喀什噶爾  
英噶薩爾三城所留馬駝牲隻應派官兵加意牧  
養計兆惠交馬七百餘匹駝七百餘隻富德交馬  
二百餘匹駝一百餘隻又健銳營官兵三百名馬  
七十餘匹駝十餘隻索倫官兵五百名馬二百餘  
匹駝四十餘隻厄魯特官兵二百名馬二百七十

餘匹駝七十餘隻等語以滿洲索倫厄魯特人數  
及所有馬駝相較究屬厄魯特為多索倫次之健  
銳營兵為數最少看來厄魯特等習知牧事始能  
如此妥協今滿洲兵多屬少年不知愛養馬駝於  
軍務未為盡善嗣後宜倣效厄魯特等牧養之法  
庶伊等駐防有資而推以教習滿洲兵丁更為有  
益著舒赫德傳諭派出之大臣官兵等即將三城  
所留馬駝加意牧養至厄魯特官兵等昨已諭令



撤回可乘騎所有馬匹歸伊旗分併著遵照辦理  
參贊大臣舒赫德等疏奏酌定和闐賦稅

舒赫德等奏言據總兵丑達將和闐六城回人  
應輸賦稅列款呈報臣等逐一查核定議一收  
獲穀石應照各城十分取一因甫經平定酌量  
減收俟來年另行定數其塔里雅沁地畝所出  
與佃人分半收取即照舊例辦理一所產玉石  
視現年採取所得交納一採金三百戶每年照

舊例交金六十兩一交納騰格錢文因六城生計未裕暫定為一萬二千騰格俟三年後酌量加增以四千充官兵三百員名鹽菜之需以七千七百分贍各城伯克及誥經支用餘三百流轉備用一貿易之伯德爾格等十戶應交金十兩請俟商人通行後再行交納一六城官果園七處既被賊踐踏基址亦小請賞給各城伯克一和闐難得銅鉛向雖藉葉爾羌等處錢文行

使現在咨取內地匠役在葉爾羌鼓鑄俟鑄出  
時酌量撥解奏入得

旨如所請行

癸未

諭叅贊大臣舒赫德等會議伊犁屯田事宜

上諭軍機大臣曰同德等奏大功告成巴里坤所駐  
綠旗兵二千二百餘名應酌量裁減九百餘名經  
軍機處議以伊犁現議屯田與其撤回不若候議

定就近發往即伊犁辦理需時亦可先往昌吉羅克倫等處以漸遷移等語業經允行可傳諭舒赫德楊應琚等此時曾否會議伊犁屯田定在何時即先往昌吉等處而農具籽種亦須豫備若來年可以增墾當令兵丁在巴里坤守候其或不能則駐兵守候與撤回後再行派往孰為便益即往酌議奏聞至屯田以足軍食自當籌其實濟以內地農民計之一人可食數人而生穀祇有此數終未

見匱乏若行之邊方即僅敷屯兵口食無所留餘  
便屬有名無實矣今已耕之土收穫無多其故安  
在併傳諭舒赫德楊應琚等與屯田大臣熟計覆  
奏

諭陝甘總督楊應琚等毋禁回人私採硫磺

上諭軍機大臣曰楊應琚奏庫車附近採買硫磺宜  
立法官辦回人不得擅取私藏等語所見殊失大  
體此在綠旗陋習以為如此立法足見其區處精

詳殊不知回部新隸版圖以土著之人取土著之物或即向官兵轉售以圖微利亦情理之常安能盡行禁絕若謂不許私藏便可防患其事與撫納降人先收兵器之見等耳且現在官兵進剿回人戰則勝攻則取前此何嘗不產硝磺又何嘗禁其採取耶所謂民可使由不可使知非惟事有難行抑亦理所不必也著傳諭該督知之

乙酉

命吐魯番郡王額敏和卓挈眷駐劄新疆

上諭軍機大臣曰現在大功告成自應令額敏和卓  
還家休息但葉爾羌等城俱屬新附必得熟悉回  
俗老成歷練之人駐劄辦理額敏和卓以舊人効  
力軍營頗著勞績深悉機宜是以暫令留駐但伊  
數年來久離家室若仍令其隻身居外朕心更為  
軫念是以諭照成衮扎布駐劄烏里雅蘇台之例  
攜眷前往可傳諭額敏和卓量攜家口暫行駐劄

俟諸事就緒即可復回著遵照辦理

命給庫車阿奇木伯克鄂斯璊助餉價值

上諭軍機大臣曰德文奏稱庫車伯克鄂斯璊因齊  
凌扎卜領兵五百護送降回捐備一月口糧支給  
起程等語鄂斯璊急公助餉甚屬可嘉著傳諭納  
世通等照數酌給價值以示體恤

丙戌

諭定邊左副將軍成衮扎布駐候哈薩克搶掠確信



上諭軍機大臣曰成衮扎布奏都爾伯特策凌烏巴什領兵三百五十名追襲搶掠烏梁海澤人伊即傳知額爾克沙喇等整兵暫駐俟虛銜藍翎塞音台吉都噶爾等探得確信即行進剿等語初聞哈薩克搶掠烏梁海之報即諭莫尼扎卜前往查勘今策凌烏巴什聞信即領兵追襲殊屬可嘉俟查辦確實再加恩獎賞此時成衮扎布若業已起程仍入京與宴或尚在束裝即留彼辦理亦可所得

信息作速奏聞

丁亥

諭護軍統領努三等酌量追賊撤兵事宜

上諭軍機大臣曰努三奏稱追襲嗎哈沁等至博斯  
克勒克嶺據嚮導等恐賊人在附近藏匿派索倫  
營總巴圖魯端濟勒圖厄魯特巴圖等領兵搜捕  
伊等隨後策應如未能弋獲即遵旨撤回等語努  
三雖派官兵追賊仍須親往督率若擒獲渠魁即

解京正法餘人俱遵節次諭旨辦理將厄魯特等酌量遣往烏魯木齊其帶領前來各隊官兵撤回巴里坤辦給車輛各回原處或賊已遠颺亦作速奏請撤兵俟來年再為辦理

戊子

諭參贊大臣舒赫德等約束安插降回

上諭軍機大臣曰德文奏稱齊凌扎卜等解送回人內有喀什噶爾等處男婦六十七名口安插庫車

葉爾羌等處男婦五十七名口安插沙雅爾等語  
從前兆惠處請將收降回人安插吐魯番曾諭以  
大功既成伯德爾格塔里嗎沁烏沙克等回人俱  
從寬免死其餘回衆不必遠行安插即留于各城  
若係葉爾羌喀什噶爾之人業已前來亦無庸復  
回遇便安插此次人數不多即如所奏辦理但此  
等隨從逆賊之人恐怙惡不悛逃竄滋事著駐劄  
大臣等留心約束稍有可疑即酌量辦理

庚寅

諭定邊左副將軍成衮扎布等籌辦進兵哈薩克事

宜

上諭軍機大臣曰成衮扎布等奏據駐納米爾沙扎海卡倫之原任藍翎侍衛布三泰報稱伊至吹阿勒和碩遇內大臣察達克等曾詢問帶傷之哈薩克人告稱搶掠烏梁海係阿布賚宰桑噶里卜有衆五百人由吹阿貝喀卜齊勒路前來仍于來路

轉回請仍照前奏領喀爾喀兵一千合都爾伯特  
烏梁海之衆前往勘明就近追勦等語阿布賚係  
久經歸附之人豈敢妄動但伊不能約束所部以  
致乘間搶掠亦未可定自當痛加懲創此時亦不  
必遽往且俟察達克策楞烏巴什莫尼扎卜等查  
奏於來年辦理所有糧餉馬匹則須密為豫備成  
衮扎布仍駐劄軍營令策布登扎布來京筵宴畢  
即同富德等領索倫兵五百名派扎哈沁都爾伯

特等千餘名餘于喀爾喀揀選約兵二千俟草青時乘哈薩克不備相機進剿一切密查妥辦即察達克等亦不必先使與聞惟期一舉蕆事以飭邊防而昭國法俱著傳諭知之

辛卯

諭叅贊大臣舒赫德等派索倫兵駐防烏魯木齊

上諭軍機大臣曰成衮扎布等奏哈薩喀搶掠烏梁海係阿布賚屬人看來必非阿布賚本意乃所屬

托名滋事但哈薩克人等素性喜于傲倖一面在  
烏魯木齊貿易一面在他處搶掠亦事之所有若  
不加防範則存貯貨物亦有可虞固不必先事張  
皇亦當豫為防範著傳諭舒赫德等回部俱有城  
郭駐兵亦多即如阿克蘇現在無事著將所留索  
倫兵調往烏魯木齊如有不敷即于葉爾羌等城  
抽派約三百名前往巡察彈壓至辦理貿易之安  
泰等如遇哈薩克貿易留心偵探察看若來人少



而馬匹牲隻多自無可疑否則未可全信當相度情形密為防範伊等即忽然竊發我已有備無患但不可以風影之疑自露形跡使遠人惶惑安泰等於哈薩克情形諒所素悉一切加意慎密庶可杜傲倖之端亦不啟猜疑之釁方為妥協

壬辰

諭定邊左副將軍成袞扎布等令察達克等偵探哈薩克確信

上諭軍機大臣曰成衮扎布奏據察達克等報稱哈薩克搶掠之時因分散游牧一時難聚是以追襲稍遲且未奉諭旨不敢遽進等語察達克等所屬被掠自必奮思報復其候旨始進亦係遵守法度但哈薩克所屬頗多諒非阿布賚游牧所為察達克等若能整兵前往捉生詢問亦可得確實信息惟進兵之時不必以奉旨為言蓋哈薩克等既經內附若小有盜竊即云奉旨發兵則伊等未免驚

懼現在大兵未進亦未免妄生輕玩且阿布賚等或遣使奏聞自可覘其虛實此時察達克若已前往即令莫尼扎卜同行亦不必使哈薩克知之

癸巳

申諭定邊左副將軍成袞扎布等詳詢烏梁海被掠情形

上諭軍機大臣曰昨據成袞扎布奏達薩克所掠烏梁海內脫出十餘人請令額爾克沙喇與莫尼扎

卜前往詢問并加撫恤等語烏梁海被掠一事可疑處頗多必須查詢明白方得辦理之法朕意或俄羅斯等欲阻阿布賚之內附托名搶掠或哈薩克以從前曾附俄羅斯被其詰責故以搶掠示信或阿布賚不能約束所部致其妄動或哈薩克錫喇尚存煽誘生事大槩不出此四端著傳諭成衮扎布即交額爾克沙喇等詳悉訪問作速奏聞仍與察達克等密商辦理

定邊右副將軍富德疏奏白都訥驍騎校署叅  
領遜塔奮勉効力得

旨遜塔著賞戴孔雀翎授為三等侍衛

甲午

辦理屯田副都統定長等疏奏查訊隨德舒遇  
賊脫出兵丁

定長等奏言臣等遵

旨查訊隨德舒遇賊脫出之綠旗兵丁除得傷不議

外其無傷而脫出最後者雖詢無臨陣先逃情  
節仍行責革至兵丁李升蘭郭永穀尋獲德舒  
身屍李善敏步行報信又遊擊素爾登額陣亡  
兵丁張倉右脇得傷仍尋獲本官身屍應請免  
議其李升蘭等三人俱鞭責發往庫車効力贖  
罪奏入報

聞

乙未

申諭定邊左副將軍成袞扎布哈薩克貿易情形

上諭軍機大臣曰永德奏哈薩克阿布賚屬人帶馬  
五百匹赴烏魯木齊貿易閱其情詞頗為恭順看  
來搶掠烏梁海者非阿布賚屬人朕昨以可疑之  
四端指示若有一於此則冒昧進兵反墮其術中  
故必詢問明白非謂大功告成遂可苟且姑息也  
額爾克沙喇等可告知察達克此時且不必直入  
哈薩克界俟促生詢問得實具奏朕再酌量辦理

丙申

諭駐劄大臣陝甘督撫等查拏厄魯特等逃犯

上諭軍機大臣曰據阿桂奏稱現在阿克蘇拏獲厄魯特匪犯三名皆官兵隨僕盜馬潛逃業經訊明正法示衆等語此等厄魯特皆勦戮之餘管束三年惡習尚未悛改阿克蘇既經拏獲則沿途必尚有脫逃者若不嚴行查拏致流為嗎哈沁地方何由寧謐著通諭哈密巴里坤闡展烏魯木齊哈喇



沙爾庫車等處大臣務宜留心拏獲訊明正法至分賞官兵之回人等有似此盜竊脫逃者亦照例辦理併傳諭楊應琚吳達善阿桂知之

叅贊大臣阿桂疏奏預籌伊犁兵糧

阿桂奏言臣到阿克蘇查看牧羣牛羊除從前解往葉爾羌一萬餘現存牛三十二頭羊一萬五千三百餘隻竊思來年伊犁駐防官兵所需糧餉須待回人收獲後方能支給其起程時所

需行糧必需牛羊添補臣已飭該管官兵加意  
牧放以濟軍需奏入報

聞

丁酉

參贊大臣舒赫德等疏奏辦理回人貢賦稅務  
舒赫德等奏言查兆惠等定議葉爾羌事宜內  
凡交納商稅外來商販二十分取一本地回人  
十分取一請俟商販流通時再行酌量定額等

語今據自土伯特商販轉回之拔達克山塔什  
罕及葉爾羌等處回人運到貨物臣等飭交該  
管之員仍照舊例分別收稅謹列單恭呈

御覽嗣後徵收稅項應請于歲底造冊送部核銷又  
扣關六城所交糧石舊例十分取一每年二千  
帕特瑪因甫經撫定酌量暫收九百九十五帕  
特瑪一帕特瑪準官石四石五斗共四千四百  
七十七石五斗俟來年仍照舊例徵收又招撫

之沙爾呼勒伯克穆喇特告云我等所管五百  
戶僅餘二百餘戶今聞霍集占伏誅自必陸續  
投回向例每戶貢金一錢請于來年照例交納  
並請添設商伯克哈子阿爾巴卜瑪喇咱爾等  
缺臣等照例給以翎頂令其協同阿奇木伊沙  
噶辦事奏入報

聞

戊戌

命賞多倫小伯克等翎頂及陞賞効力官員

上諭軍機大臣曰書山奏稱總管阿布都賚安插多倫回人四千六十餘名于玉古爾庫車勒策達雅爾羊雜爾等四處令小伯克海底勒額帕訂庫爾密喇三克里達瑪特等分管現在率同吐魯番公素賚璫遊擊黃佳士悉心查辦等語海里勒等五名既係小伯克著加恩賞給六品頂帶素賚璫著賞緞二端黃佳士著以應陞之缺補用

巴里坤辦事道銜同德等疏奏添派臺站馬匹  
同德等奏言查凱旋官兵及入覲回人等長途  
需馬接濟已奉

諭旨於巴里坤牧羣內挑選一千兵由哈密至葉爾  
羌按臺安設今准兆惠等行文辦解肥馬五百  
匹至吐魯番附近之伊拉里克等處牧放以備  
更換等語臣等復會同總兵存泰如數挑選馬  
匹令參將齊大勇解送伊拉里克于十二月初

九日起程奏入報

聞

己亥

定邊將軍兆惠等疏奏率同伯克霍集斯來京  
兆惠等奏言查伯克霍集斯與臣富德自拔達  
克山撤兵回抵葉爾羌伊等歸烏什整裝約於  
阿克蘇會同入京臣等若阻其前往恐啟猜疑  
即遣赴烏什臣等至阿克蘇伯克霍集斯率伊

子托克托索丕來會今與臣等同行毫無疑貳  
臣等派伊同玉素富約束衆回人伯克行走伊  
子漢咱吧爾呼岱伯爾氏托克托索丕俱已成  
丁其幼子尚有幾人亦交舒赫德查核辦理奏  
入

上諭軍機大臣曰兆惠等密奏伯克霍集斯業已同  
行其諸子自成丁之外幼者尚有幾人交舒赫德  
查辦等語從前密諭辦送霍集斯及諸子來京者



恐其仍居舊地或滋事端今霍集斯既情願入覲而沿途行走情形又毫無可疑則伊來京後自必加以恩賞俾得安居此時漠咱忒爾等尚須辦理起程併傳諭舒赫德等遵照節次諭旨毋使長途勞苦伊等起程後則所查霍集斯之家口不妨明白曉示以霍集斯蒙恩旨留京來取家屬團聚務宜供給饒裕加意照看蓋伊等非獲罪之人籍沒家產者可比所有積蓄俱一同辦送仍約束兵丁

回人毋許妄行偷竊其田園房屋亦應變價給賞  
以資生計俱著查明具奏

癸卯

訓飭內閣學士清馥速奏追賊情形

上諭軍機大臣曰清馥奏據嚮導根敦等所指道路  
南路由諾顏鄂博額什等處抵楚庫爾戈壁北路  
由烏蘭庫勒等處搜賊人營壘因水草甚乏令茂  
庫本等領兵二十餘名前往其餘官兵撤回巴里

坤等語所奏愈屬不堪前因清馥探得賊人藏匿處所並未親身前往故十月以前屢經降旨申飭今已十二月並未遇一嗎哈沁不知伊現在何處且伊前遣巴圖克勒木往招其子斗齊特故縱其父子同逃耳不然豈有賊人肯坐候我兵擒獲此時賊人去向更覺茫無影響而徒作懼罪請追之詞苟延時日苦累官兵諒數月以來行糧恐亦不繼伊身獲咎忍饑固所當然而官兵皆隨同枵腹

有是理乎著述傳諭清馥奉到此旨若十日內能捕獲賊人自當前往其或不能即撤回巴里坤將從前伊何以不親身捕賊但遣巴圖勒克木前往及斗齊等今往何處聲明請罪具奏

乙巳

諭叅贊大臣舒赫德等辦理伊犁屯田事宜

上諭軍機大臣曰阿桂奏稱兆惠等經過阿克蘇會議伊犁駐兵及遷移回人屯田事宜從阿克蘇烏

什賽里木拜庫車沙雅爾等城酌派回人二三百戶於來年二月間先遣丁壯前往屯田以官兵五百名護送起程俊青草生時再將回人家口遷移等語所議尚屬可行兆惠此時雖未具奏即應如此辦理至屯田回人需兵彈壓自阿克蘇至伊犁安臺傳事聲息相通最關緊要著傳諭舒赫德阿桂今大功告成拔達克山霍罕等部落悉皆歸附則葉爾羌自可安靜無事且有額敏和卓在彼海

明又已前往舒赫德候其到時即回阿克蘇駐劄  
辦事阿桂伊柱即領駐防兵丁護送回人往伊犁  
管理屯田事務至官兵等居止自必相度地勢安  
營立寨土木之工以漸興作期于堅固久遠所請  
備造帳房原非可以常用不過自阿克蘇至伊犁  
沿途住宿及初到時不致露處耳所有應行事宜  
俱著伊等會商辦理

丙午

議移駐官兵事宜

安西提督劉順奏言現議官兵移駐巴里坤歲需口糧運送回空總計需銀四十七萬餘兩殊為繁費即闢展烏魯木齊等處收獲糧石足用而相距千餘里運費亦繁查移駐巴里坤兵三千五百名內步兵一千四百名請全行改撥馬兵按每石加增銀一兩五錢之議共銀一十一萬餘兩較之運費歲可節省銀三十六萬餘兩

且馬兵錢糧較步兵寬裕易於辦理並懇借庫銀五萬兩照蒙古之例採買牛羊孳生並買馬駝運送所借銀兩分作四年扣還奏入得

旨軍機大臣議奏尋議移駐官兵口糧歲所必需已里坤雖現在屯田止產青稞一種是以臣等原議以加增兵丁糧價自行購買殊費周章請令該督等查明屯田歲收若干足敷官兵口糧與否通行籌畫妥議具奏今該提督以闕展等處



收穫即敷口糧而運費亦繁等語查提督原駐安西經該督楊應琚奏請移駐巴里坤但巴里坤以外西至伊犁西南至葉爾羌等回部幅員廣衍而闢展烏魯木齊一帶地土饒沃水泉充裕現在駐兵屯田交通貿易久成內地莫若將提督之提標五營內酌留兵丁足敷巴里坤城守外其各營官兵即移駐烏魯木齊或闢展等處于歲收屯糧內就近支給既可省輓運之勞

而於新疆適中之地控制更為得宜其如何建  
設衙署營房及一切妥協商辦之處該督楊應  
琚現在出關查勘應令其詳悉定議具奏奏入  
上從之

平定淮噶爾方略正編卷八十三

欽定四庫全書

平定準噶爾方略正編卷八十四

乾隆二十五年春正月戊申

恩免甘肅來年地丁錢糧及賑貸被災州縣

上諭大學士曰甘省自軍興以來連年加恩豁免正  
雜錢糧及一切展賑緩徵酌增運費所有正賦已  
蠲至二十五年俾邊氓普沾渥澤現在大兵凱旋  
軍務全竣正宜與民休息且上年歲收未能豐稔

朕心尤深軫念著再加恩將甘肅省乾隆二十六年應徵地丁錢糧通行豁免俾得共安耕鑿永承樂利之休以示朕優恤邊氓有加無已至意又

諭曰甘省上年夏秋田禾均被偏災其較重之皋蘭等十廳州縣及次重之靜寧等州縣已降旨分別加恩展賑其災輕之渭源涇州等十七廳縣亦經照例蠲緩賑恤並於春初借糶兼行以資接濟惟念勘不成災處所夏田被旱改種秋禾小民已費

工本未免拮据著加恩將所有春借籽種牛價緩至麥熟後徵還仍於青黃不接之時酌借籽種口糧俾得盡力耕作至該省被災等處尚有無業貧民艱於口食者並著飭令地方官或設廠煮賑或開工傭作俾得餬口以示體恤該部遵諭速行又諭曰甘省蘭州涼州平涼慶陽一帶上年偶被偏災已加恩一體賑恤但念邊氓生計拮据春耕在即而例賑將停恐不足資接濟著再加恩無論被災

分數極次貧民將臯蘭金縣平番古浪會寧安定  
固原靖逆環縣鹽茶等十廳州縣於正賑之外再  
展賑至麥熟後停止靜寧隆德狄道三州縣再展  
賑四個月靈州花馬池中衛河州碾伯五廳州縣  
再展賑三個月俾小民得以餬口力耕副朕念切  
痼瘼至意又

諭曰甘省被災各屬倉儲未能充裕業令該督撫撥  
運本省及陝省倉糧共四十餘萬石分貯災屬備

用但春間賑糶兼行恐有不敷著於鞏昌寧夏西寧秦州四府州倉儲有餘之處除留本地備用外再酌撥十餘萬石就近運赴被災各屬俾賑恤借糶得以寬裕儲備

命立限報銷軍需款項

上諭大學士曰西陲大功告成統計辦理軍需前後甫及五年款項易於稽查現在自乾隆二十年以前各案動用錢糧俱經分晰辦理其乾隆二十年



九月至二十四年凱旋之日辦理軍需各項錢糧  
口內子限一年口外子限年半該督撫等督率承  
辦地方各員分別案款詳悉造冊報銷毋任遲延  
以清案牘

庚戌

命給烏魯木齊大臣關防及揀選辦事官員

上諭軍機大臣曰安泰等奏現在烏魯木齊等處屯  
田與哈薩克交易請賞給關防及派員辦事等語

著照所請賞給關防仍著陝甘兩省揀選滿洲道  
員一人同知通判州縣四員縣丞雜職八員發往  
烏魯木齊道員總辦收支各屯糧餉同知等官分  
辦各屯糧餉地方事務其涼州等處駐防有熟習  
滿漢文字之領催前鋒著揀選十員令其協辦事  
務伊等若行走勤慎即照臺站委署筆帖式之例  
辦理効力出衆者行文各該處以應陞之缺開列  
補用

命賞駐劄葉爾羌總兵容保駐劄英噶薩爾總兵楊  
寧戴孔雀翎

辛亥

申諭定邊左副將軍成袞扎布等辦理烏梁海事宜  
上諭軍機大臣曰成袞扎布奉到命策布登扎布富  
德領兵二千辦理烏梁海被掠諭旨將現在應調  
官兵及牧羣馬匹酌議具奏所辦尚是但此事朕  
屢有明諭必將賊人部落查詢確實始可進兵至

所奏牧羣馬五千餘匹駝九百餘隻牛羊計二萬  
餘而都爾伯特烏梁海等俱各有乘騎不過酌量  
賞賚則軍需甚為足用此時惟加意牧放以候額  
爾克沙喇等實信即作速奏聞

命議叙陞用哈密辦事道員文綬等有差

上諭軍機大臣曰據五吉等奏哈密辦事道員文綬  
遊擊陳尚勲都司薩靈阿州同張春俱實心奮勉  
署防禦驍騎校雙明署筆帖式馬甲伊本泰領催

瑚納前鋒三多領催馬玉馬甲諾爾布等俱勤慎  
無悞等語文綬著加恩交部議叙仍著軍機處記  
名陳尚勲薩靈阿張春著交督撫記名以應陞之  
缺補用署防禦雙明著准其實授伊本泰瑚納著  
賞給驍騎校職銜遇缺即補三多馬玉交該將軍  
以應陞之缺補用諾爾布既係開戶不便補授旗  
缺著以綠旗把總用

喀爾喀公品級三都卜多爾濟以軍前奮勉効

力

命加恩晉封輔國公

癸丑

諭叅贊大臣舒赫德等派兵搜捕嗎哈沁

上諭軍機大臣曰據努三等奏遵旨於十二月十二

日起程赴京并咨明舒赫德阿里衮等語著傳諭

舒赫德等努三既遵旨來京而搜捕嗎哈沁一事

又正當春令著派豐訥亨於索倫蒙古兵內挑選

堪勝營總一員及努三所留厄魯特嚮導等辦給馬匹口糧前往阿勒坦和碩等處搜捕戕害德舒賊人務期弋獲一舉廓清方為妥協其兵丁即就近調撥努三奏敘之嚮導錫喇庫本恩克勒德克孟克津既屬効力著將其家口一併送京

命復察哈爾原任佐領鄂勒錐圖職

上諭軍機大臣曰努三等奏稱察哈爾正黃旗原任佐領署營總鄂勒錐圖因管臺時兵丁遺失所送

事件革職効力今伊解送阿里蘇羊隻搜捕嗎哈沁甚屬奮勉從前曾隨兆惠在濟爾哈朗突圍等語鄂勒錐圖著加恩復還原職

命阿克蘇等處駐劄大臣派員赴肅州核銷軍需

上諭軍機大臣曰納世通奏現在軍務告竣阿克蘇庫車哈喇沙爾闢展巴里坤哈密等處俱有承辦軍需應至肅州銷算但阿克蘇等處相隔甚遠往返查核未免致勞臺站請將各處承辦錢糧之章



欽定四庫全書

平定準噶爾方略正編  
卷八十四

七

京筆帖式及地方官書吏等派出數人攜帶冊檔  
往肅州軍需局核對登答等語著照所請交各該  
處辦事大臣即派員赴肅州銷算仍著該督於道  
府內酌派一員專司辦理

甲寅

命叅贊大臣阿桂等協同搜捕嗎哈沁

上諭軍機大臣曰昨諭舒赫德等派豐訥亨領兵於  
阿勒坦和碩等處搜捕戕害德舒賊人今思阿桂

伊柱雖派辦護送回人前往伊犁屯田尚需時日  
著先派官兵五百名同豐訥亨等搜捕嗎哈沁務  
宜協心奮勉以清方域若該處馬匹不足即著五  
吉於巴里坤牧羣內揀選二三千匹親行送往阿  
克蘇以備軍需

乙卯

霍罕額爾德尼伯克使人陀克塔瑪特車里克  
卓爾瑪特使人呼達呼里等至京入

觀

上御乾清宮陞座陀克塔瑪特等行三跪九叩頭禮

命坐

賜茶

召至御座前

親加慰問陀克塔瑪特等叩頭謝

恩出

賜護送霍罕使人之頭等待衛達克塔納墨爾根巴

圖魯號仍賞銀一百兩

丙辰

拔達克山素勒坦沙使人頭穆爾伯克巴圖爾  
伯克及博洛爾使人沙伯克等至京入

覲

上御乾清宮陞座額穆爾伯克等行三跪九叩頭禮

命座

賜茶

召至御座前

親加慰問額穆爾伯克等叩頭謝

恩出午刻

上幸豐澤園

御幄次

賜拔達克山霍罕諸部落使人筵宴二品以上文武

大臣皆預宴

丁巳

行受俘禮

上御午門樓陞座解送俘馘官兵行禮畢兵部尚書  
李元亮奏定邊將軍兆惠等函送逆回霍集占  
首級併俘囚們多索丕等謹獻

闕下請

旨傳

制著交刑部尚書鄂彌達等承

旨訖諸王公大臣及拔達克山霍罕使人行慶賀禮

畢

上韋豐澤園幄次

賜外藩蒙古王公台吉及拔達克山諸部落使人宴

尋

命懸逆賊霍集占首級於通衢宥俘人們多索丕等

布魯特額德格訥阿濟比使人錫喇噶斯等至

京

命入宴時坐於霍罕使人之次

命陞賞厄魯特侍衛薩穆坦等有差

上諭軍機大臣曰厄魯特二等侍衛薩穆坦葉爾羌伯克三等侍衛索勒屯和卓沙爾呼勒伯克虛銜監翎阿布賚三奉使拔達克山俱屬黽勉薩穆坦著授為頭等侍衛在乾清門行走伊尚未出痘著同伊妻子一併於察哈爾安插索勒屯和卓著陞為四品阿布賚三著陞為五品各賞衣一襲

命賞解送俘馘之正黃旗頭等侍衛額爾登額銀一



百兩授侍衛伍岱為頭等侍衛賞銀六端賞侍  
衛成果綴三端

戊午

命陞賞厄魯特獎賞孔雀翎阿塔什等有差

上諭軍機大臣曰隨額爾登額解送逆賊首級及們  
多索丕等來京之厄魯特獎賞孔雀翎阿塔什著  
授為二等侍衛愛呼獎賞孔雀翎塔里善厄魯特  
藍翎侍衛敦多克著授為三等侍衛吉林防禦阿

林保著賞戴孔雀翎右衛馬甲納達齊三姓前鋒  
阿爾蘇納領催伊三泰索倫領催西圖庫爾馬甲  
禮達俱著授為藍翎侍衛隨達克塔納護送使人  
之索倫領催訥卜齊披甲卓多巴著授為藍翎侍

衛

己未

上幸萬壽山

御勤政殿布魯特阿濟比使人錫喇噶斯等行禮畢

欽定四庫全書

平定津噴兩方略正編  
卷八十四

上召至御座前

親加慰問隨

命同蒙古王公台吉及拔達克山等使人入宴

命陞賞厄魯特獎賞藍翎薩爾泰等有差

上諭軍機大臣曰隨侍衛達克塔納護送霍罕使人  
之厄魯特獎賞藍翎薩爾泰著授為藍翎侍衛巴  
爾虎驍騎校三集著戴獎賞藍翎護送額德格訥  
使人之藍翎侍衛恩克濟庫厄魯特藍翎侍衛和

屯俱著授為三等侍衛

庚申

命叅贊大臣阿里衮回京

上諭軍機大臣曰阿里衮久在軍營著派新柱馳驛  
前往更換俟到日阿里衮將一應事務明白交代  
即馳驛回京

命陞賞回人摩羅莫爾瓚等有差

上諭軍機大臣曰回人摩羅莫爾瓚隨達克塔納前

欽定四庫全書

平定津噶爾方略正編  
卷八十四

三

往霍罕瑪爾噶朗安集延等處頗屬奮勉著加恩  
授為五品並准戴翎仍賞緞四端衣一襲

諭叅贊大臣舒赫德等辦理漠咱吧爾及鄂對頗拉  
特事宜

上諭軍機大臣曰據舒赫德奏奉到辦送漠咱吧爾  
諭旨擬以公事調來葉爾羌再行解送亦行文阿  
桂將伊弟呼岱巴勒氏辦送昨據阿桂奏酌量情  
形相機辦理看來此事尚屬易辦今又據奏阿克

蘇伊沙噶伯克頗拉特密呈回人等聯名文書許  
阿奇木伯克鄂對過失請以頗拉特代任已面斥  
擲還等語回人猜妬擠排乃其舊習自當嚴為杜  
絕鄂對果不勝任亦不當因頗拉特之言遽行斥  
革且鄂對即因此獲咎而頗拉特藉端聳聽希圖  
代任之罪亦應察究斷無墮其譎計竟授為阿奇  
木之理鄂對現隨兆惠來京俟到日再行詢問辦  
理俱著傳諭知之

諭巴里坤辦事道員同德查訊捕獲之嗎哈沁等

上諭軍機大臣曰清馥奏稱追捕嗎哈沁至莽堪額爾紀斗齊已經遁去獲其妻室及所屬畢克拉扎卜等又招服根敦扎木揚等戶口送往巴里坤質訊若無為匪情事請送肅州備賞其扎木揚與弟持穆爾斗齊屬人達什扎卜留為嚮導又訊得喇嘛伊什班珠爾曾勸斗齊逃走請於巴里坤正法畢克拉扎卜等曾盜巴里坤打牲人等馬駝或即

正法或解京備賞等語喇嘛伊什班珠爾畢克拉  
扎卜情罪可惡著同德等訊明正法其根敦扎本  
揚所屬人口著與斗齊家口一併送京再斗齊之  
父巴圖克勒木往尋伊子曾否相遇清馥亦宜問  
及奏內並未聲明此等情節俱著同德查審具奏  
命調巴里坤綠旗兵九百名赴烏魯木齊屯田

上諭軍機大臣曰安泰奏稱奉到巴里坤綠旗兵可  
否調往烏魯木齊諭旨現在烏魯木齊糧石頗屬



饒裕內地所辦農器多在巴里坤所有兵丁九百  
名與其在彼守候即可調來烏魯木齊屯田等語  
烏魯木齊增兵開墾既有益屯田而哈薩克貿易  
往來昨尚諭派索倫兵數百名駐劄防範今增調  
此項兵丁更足以壯聲威即照所奏辦理

辛酉

上御正大光明殿陞座

賜朝正外藩筵宴拔達克山等部落使人皆與宴

命豫備舉行郊

勞典禮

上諭大學士曰朕於二月初八日啟鑾恭謁

東陵禮成迴次圓明園恭請

皇太后安駐蹕數日於二十二日啟鑾恭詣

泰陵祇謁計迴鑾時將軍大臣等正屆凱旋即於旋蹕

黃新莊次日前往郊勞所有應行典禮該衙門敬

謹豫備

諭定邊將軍兆惠等解送回人厄敏都管等來京

上諭軍機大臣曰兆惠等奏前據伯克霍集斯告稱  
伊從弟厄敏都管霍什提卜曾通信霍集占不可  
留於舊地因將伊等拏禁庫車應請旨正法或送  
內地充賞等語大功告成厄敏都管等著從寬免  
其正法俟解送京師時再行請旨

諭叅贊大臣阿桂等酌辦伊犁屯田事宜

上諭軍機大臣曰阿桂奏伊犁駐防屯田皆必需辦

理之事若酌派回人先往屯回再添駐官兵增派  
回衆即易為力請早為調撥起程等語具見勇往  
任事適據兆惠富德楊應琚等會議本年屯田恐  
已踰期但可遣兵巡查已行文各駐劄大臣訖阿  
桂若業經准咨停止則奉到此旨亦未必能猝辦  
或伊現在辦理有緒且確見必須屯田即酌量帶  
兵前往併傳諭舒赫德楊應琚知之

定邊將軍兆惠等疏奏續查陣亡官兵

兆惠等奏言欽奉

諭旨因索倫佐領引

見時詢出佐領格勒車爾尼薩勒圖陣亡名冊未經  
送部交臣等查奏今據副都統鄂博什等呈稱  
二人陣亡屬實又同格勒車爾在阿魯海擊賊  
陣亡尚有索倫兵十六名同尼薩勒圖送文遇  
賊陣亡尚有兵十七名俱係將軍等交代時遺  
漏又副都統阿敏道前往回部所領索倫兵查

出被害有名者四十四人餘丁僕役三人倘仍有遺漏於撤回該管官員處查明補報謹造冊送部照例請卹奏入報

聞

壬戌

諭御前侍衛署副都統安泰等酌調索倫兵丁

上諭軍機大臣曰安泰等奏稱烏魯木齊祇有綠旗兵屯田其防範哈薩克等仍須索倫察哈爾兵請

於葉爾羌等處調取一百名聽用等語朕昨已傳  
諭舒赫德等酌於回城所駐索倫兵內抽調三百  
名前往烏魯木齊安泰所請兵數為數尚少著傳  
諭伊等仍遵前旨辦理

命在京安插回人分歸理藩院內務府管轄

上諭軍機大臣曰在京安插回人內額色尹係公品  
級瑪穆特圖爾都和卓係扎薩克應歸理藩院管  
轄又樂工匠藝人等共編一佐領其佐領著白和

卓補授歸內務府管轄嗣後續到回人均入此佐領下

命將解送來京之革職噶雜納齊伯克副總管巴巴克及其家口人等交內務府與前次解到回人一體安插

丙寅

諭定邊左副將軍成袞扎布等派兵防範哈薩克上諭軍機大臣曰成袞扎布奏莫尼扎卜報稱於恰



克圖得俄羅斯文書有哈薩克統衆三萬分三路  
侵犯卡倫之語看來此必係俄羅斯虛辭設間若  
其事果屬確實伊部落又豈肯通信然亦不可不  
豫為準備著策布登扎布馳驛至烏里雅蘇台領  
兵赴布延圖防範若宜前進亦即相機辦理成衮  
扎布仍駐劄烏里雅蘇台接濟糧餉此行有兵二  
千名方安除派調索倫兵一千名外成衮扎布即  
將都爾伯特扎哈沁烏梁海兵丁揀選數百名不

足者以喀爾喀兵充補其馬匹牲隻口糧皆籌酌辦理又

諭曰烏里雅蘇台軍營需兵防守著噶布舒諾們察馳驛前往選派呼倫貝爾之索倫達呼里兵五百名黑龍江墨爾根齊齊哈爾三處之索倫兵五百名交署將軍副都統舒泰辦理馬匹牲隻軍器口糧索倫達呼里兵向無俸餉年來効力軍營甚屬黽勉著加恩照呼倫貝爾官兵例賞給一半俸餉

其額數著定為二千名舒泰即曉諭官兵等知之  
烏梁海副管旗章京赤倫病故

命伊子蒙肯襲職

上諭軍機大臣曰成衮扎布奏烏梁海副管旗章京  
赤倫病故應否令伊長子蒙肯襲職等語赤倫患  
病溘逝朕心深為軫惻其副管旗章京著加恩准  
伊長子蒙肯承襲仍戴獎賞孔雀翎

命賞喀爾喀王策布登扎布桑寨多爾濟各銀一千

兩車木楚克扎布銀五百兩二等待衛納旺銀一百兩

丁卯

諭定邊左副將軍成袞扎布等查訊都爾伯特屬人  
訐控事宜

上諭軍機大臣曰成袞扎布等奏都爾伯特營旗章  
京策塔爾等因其汗索諾木袞布懦弱而哈屯布  
尼達喇約束所屬頗嚴計欲遣回母家據報差員

查訊俱將哈屯理直應將策塔爾等治罪但伊部落向無定例請將策塔爾等革職安插其汗哈屯家務交扎奇魯克齊和通副管旗章京巴顏克什克等辦理等語成衮扎布等所辦未免姑息在伊等以布尼達喇乃喀爾喀部落之女若重治策塔爾等則有徇庇之嫌殊不知策塔爾為人臣僕而威脅其汗欲逐出哈屯不法已極自應從重治罪或念伊等新附未知禮法姑從寬典亦不可存留

舊地致起釁端可傳諭成衮扎布即將伊等互許之屬人傳齊訊問將其中不受布尼達喇約束因而訂讐設計者著即解送來京至其互許供詞有策凌烏巴什欲叛之語諒係捏造成衮扎布即置若罔聞方為妥協其擬派都爾伯特管旗人員著照所請行

命派員護送拔達克山等部落使人

上諭軍機大臣曰拔達克山等部落歸降遣使入覲

朕加恩宴賚不日遣回游牧應派員護送其護送  
拔達克山使人仍著額爾登額索勒屯和卓前往  
再添派明仁巴朗同行護送霍罕使人著伍岱阿  
布賚三摩羅莫爾瓚前往添派索諾木車凌諾爾  
占同行俟使人等各抵本界明仁額爾登額巴朗  
索勒屯和卓為一隊賚勅書賜物前往痕都斯坦  
索諾木車凌伍岱諾爾占阿布賚三摩羅莫爾瓚  
為一隊賚勅書賜物前往布哈爾頒給各該頭目

命其祇受

命乾清門二等侍衛納旺等傳

諭曉示哈薩克阿布賚事宜

上諭軍機大臣曰納旺熟悉哈薩克情形著前往宣

諭阿布賚云我駐劄烏里雅蘇台將軍等據報有

統衆搶掠烏梁海者自稱哈薩克部落或稱係阿

布賚親身統領將軍等奏請興師問罪奉大皇帝

諭旨阿布賚受朕深恩焉敢妄為其中恐有別情



應行查詢明確又據查獲俄羅斯管烏斯得衣尼  
卡倫頭目寄管雅薩什諾衣頭目書札內稱哈薩  
克統衆三萬渡伊爾得衣什河將至烏斯得衣尼  
可將雅薩什諾衣之人引避附近俄羅斯邊界等  
語其事深屬可疑阿布賚恭順有加其屬人來烏  
魯木齊貿易者相繼自必不應出此或係俄羅斯  
詭詞設間俾我加兵哈薩克以快其意又慮查訊  
得實故捏造此書使我不疑情形顯然但哈薩克

游牧從來散處或彼此妄行搶掠不令阿布賚知  
悉亦未可定阿布賚惟應據實陳奏自當斟酌辦  
理此旨即著納旺詳悉傳諭仍賜阿布賚緞四端  
戊辰

命革內閣學士清馥職効力贖罪

上諭軍機大臣曰據清馥奏搜捕逃賊斗齊等因雪  
盛迷踪未獲等語清馥前此追賊並未親身前往  
惟委之官兵致被賊誘去馬匹又借護送軍營馬

匹為名竟回巴里坤業經部議革職因伊奉到申飭之旨復行前往是以暫令註冊以觀後效今既疎脫首犯罪不可追著革職交舒赫德差遣効力贖罪

庚午

叅贊大臣舒赫德等疏奏採辦駐防火藥

舒赫德等奏言查阿克蘇出產硝磺臣曾派回八十戶採取交納又行文阿桂酌量增派數戶

以供阿克蘇烏什駐防兵丁之用至葉爾羌所用火藥於沙爾呼勒托郭斯謙採取硫磺以葉爾羌所產之硝配造其鉛子於和什喇卜製造和闐所用火藥於克勒底雅取硝於塔克取磺配造其鉛子於阿克蘇葉爾羌採買製造喀什噶爾附近產硝亦由沙爾呼勒取磺配造火藥於特勒克製造鉛子現在各城駐防兵丁共五千三百名內鎗礮手三百餘名一年所需火藥

約八九千觔即分派各城回人採辦其如何定價抵補伊等應交糧石俟次年辦交時酌議具奏嗣後需用火藥鉛子停止內地運送奏入報聞

辛未

叅贊大臣舒赫德等疏奏土伯特等部落貿易事宜

舒赫德等奏言據薩納珠卡倫送到土伯特使

人達什佳木撮等十人稱係拉達克汗所遣齎書呈送臣會同大臣官員等傳見達什佳木撮云我係管轄右界五千戶頭目聞大兵平定回部特奉書稱賀請通貿易以番緞回帶為贄臣等宣慰筵宴訖授以復拉達克汗書及蟒錦緞疋并分賞來使緞布令其起程再查現在回部安靜其布魯特霍罕安集延瑪爾噶朗等貿易之人絡繹不絕臣等照舊例收稅數次後回城

伯克等懇告云舊例收稅稍重彼時牲隻價賤尚不甚累今逆酋擾害之後葉爾羌喀什噶爾羊一隻價至十餘兩肥馬一匹價至五六十兩商賈未免觀望不前祈暫行減收等語臣等察看情形屬實謹擬將回人買來牲隻十分取一暫改為二十分取一外來商人牲隻二十分取一暫改為三十分取一其餘皮張緞布仍照舊例則貿易者多稅課自然豐裕奏入報

聞

甲戌

上御豐澤園幄次筵宴拔達克山霍罕安集延等使  
人

命王公大臣及蒙古王公貝勒貝子等俱預宴

乙亥

申諭乾清門二等待衛納旺曉示哈薩克阿布賚

上諭軍機大臣曰據安泰等奏哈薩克阿布賚屬人



於正月初來烏魯木齊貿易並獻馬三匹等語哈薩克於去冬今春往來不絕其情詞益為恭順則搶掠烏梁海一事斷非出自阿布賚可知著傳諭納旺即與同行厄魯特侍衛等速赴烏魯木齊酌派兵丁數名前往哈薩克與阿布賚相見時不得致令驚疑可備述前後情節俾伊得據實查明委係何處人等搶掠一得確信速行奏聞

平定準噶爾方略正編卷八十四